

Parlamentarna skupština BiH mora poništiti odluku o produženju perioda za isplatu plata bivšim zastupnicima

OHR poziva izabrane delegate Parlamentarne skupštine BiH da ponište odluku donesenu na mala vrata, koja bivšim članovima Parlamenta osigurava puno bolje uslove od onih sa kojima se suočava ostatak stanovništva.

U julu ove godine zastupnici u Parlamentarnoj skupštini BiH pokušali su usvojiti Zakon o pravima i dužnostima članova Parlamenta koji bi im osigurao veće penzije i druge povlastice nego što ima ostatak stanovništva u BiH. To je izazvalo opšti prezir i neodobravanje javnosti, i kao rezultat toga Zakon nije usvojen.

Jedan element tog zakona bio je prijedlog da se sa šest na dvanaest mjeseci produži period u toku kojega bivši parlamentarci – bilo da su se iz Parlamenta povukli dobrovoljno ili im je izglasano nepovjerenje – i dalje primaju punu platu koja sleduje članove Parlamenta.

Krajem septembra Administrativna komisija Zastupničkog doma BiH i Komisija za administrativna i finansijska pitanja Doma naroda BiH ovu odredbu jednostrano su usvojile, a na snagu je stupila odmah.

To znači da, dok stotine hiljada građana BiH teško žive zbog nezaposlenosti i siromaštva, bivši članovi Parlamenta će godinu dana uživati punu platu bez obzira na činjenicu da ona ne podrazumijeva nikakve dužnosti.

Ovu jednostranu odluku parlamentarnih komisija za

administrativna pitanja da usvoje odredbu koju je Parlamentarna skupština u punom sazivu odbacila a koja materijalne interese parlamentaraca stavlja ispred interesa građana koji su ih birali treba poništiti.